

PWYLLGOR CRAFFU CYMUNEDAU, 18 EBRILL 2024

Presenoldeb:

Y CYNGHORWYR: Elin Hywel (Cadeirydd)
Annwen Hughes (Is-gadeirydd)

Stephen Churchman, Elwyn Edwards, Delyth Lloyd Griffiths, Jina Gwyrfai, Linda Morgan, Edgar Owen, Beca Roberts, Arwyn Herald Roberts, Elfed Powell Roberts, Peter Thomas, Rob Triggs a Gruffydd Williams.

Swyddogion yn bresennol:

Bethan Adams (Ymgynghorydd Craffu), Rhodri Jones (Swyddog Gwasanaethau Democratiaeth) a Geraint Owen (Cyfarwyddwr Corfforaethol).

Yn bresennol ar gyfer Eitem 5:

Sandra Lynne Thomas (Rheolwr Rhaglen Bwrdd Gwasanaethau Cyhoeddus Gwynedd ac Ynys Môn).

Yn bresennol ar gyfer Eitem 6:

Y Cyngorydd Berwyn Parry Jones (Aelod Cabinet Priffyrdd, Peirianeg a YGC), Steffan Jones (Pennaeth Adran Priffyrdd, Peirianeg a YGC) a Gareth Roberts (Peiriannydd Ardal Dwyfor, Adran Priffyrdd, Peirianeg a YGC).

Yn bresennol ar gyfer Eitem 7:

Y Cyngorydd Berwyn Parry Jones (Aelod Cabinet Priffyrdd, Peirianeg a YGC), Steffan Jones (Pennaeth Adran Priffyrdd, Peirianeg a YGC), Peter John Simpson (Rheolwr Gwasanaethau Stryd, Adran Priffyrdd, Peirianeg a YGC) a Sara Marged Jones (Rheolwr Prosiectau, Adran Priffyrdd, Peirianeg a YGC).

1. YMDDIHEURIADAU

Derbyniwyd ymddiheuriadau gan y Cyngorwyr Kim Jones, Llio Elenid Owen, Rhys Tudur, Robert Glyn Daniels a'r Cyngorydd Dyfrig Siencyn (Arweinydd y Cyngor).

Diolchwyd i'r Cyngorydd Gwilym Jones am ei gyfraniad i'r Pwyllgor dros y ddwy flynedd ddiwethaf. Croesawyd y Cyngorydd Jina Gwyrfai fel Aelod newydd i'r Pwyllgor.

2. DATGAN BUDDIANT PERSONOL

Ni dderbyniwyd unrhyw ddatganiad o fuddiant personol.

3. MATERION BRYD

Dim i'w nodi.

4. COFNODION

Llofnododd y Cadeirydd gofnodion y cyfarfod blaenorol o'r pwyllgor hwn a gynhaliwyd ar 22 Chwefror 2024, fel rhai cywir.

5. TREFNIADAU CYFLAWNI BWRDD GWASANAETHAU CYHOEDDUS GWYNEDD AC YNYS MÔN

Cyflwynwyd yr adroddiad gan y Cyfarwyddwr Corfforaethol (yn absenoldeb Arweinydd y Cyngor) a Rheolwr Rhaglen Bwrdd Gwasanaethau Cyhoeddus Gwynedd ac Ynys Môn. Tynnwyd sylw'n fras at y prif bwyntiau canlynol:

Eglurwyd bod yr Adroddiad yn cyflwyno trefniadau cyflawni Bwrdd Gwasanaethau Cyhoeddus Gwynedd a Môn ar gyfer 2024-2025 yn seiliedig ar Gynllun Llesiant 2023-2028 Gwynedd a Môn. Manylwyd bod tri Amcan Llesiant penodol o fewn y cynllun sef:

- Gweithio i liniaru effaith tlogi ar lesiant ein cymunedau.
- Gweithio i wella lles a llwyddiant ein plant a phobl ifanc er mwyn gwireddu eu llawn botensial.
- Gweithio i gefnogi ein gwasanaethau a'n cymunedau i symud tuag at sero net carbon.

Ychwanegwyd bod 'Pwysau Iach: Cymru Iach', strategaeth hirdymor Llywodraeth Cymru i atal a lleihau gordewdra yng Nghymru, wedi cael ei fabwysiadu gan y Bwrdd fel llinyn euraidd ac fe fydd yn cael ystyriaeth ganolog i weithrediad y Bwrdd. Ystyriwyd sut bydd y Bwrdd yn monitro'r llinyn euraidd hwn gan gofio fod yr iaith Gymraeg hefyd yn llinyn euraidd drwy weithrediad y Bwrdd.

Cydnabuwyd nad oedd yr iaith Gymraeg i'w weld yn amlwg fel ei fod yn ganolog i waith y Bwrdd, fel soniwyd mewn trafodaethau am waith y Bwrdd yn y Pwyllgor hwn. Pwysleisiwyd bod newid wedi cael ei gyflwyno gan y Bwrdd er mwyn sicrhau fod yr ymrwymiad i'r iaith Gymraeg llawer fwy amlwg erbyn hyn. Sicrhawyd bod holl bartneriaid y Bwrdd yn gweithredu gyda'r Gymraeg yn ganolog i'w hystyriaethau.

Cadarnhawyd bod nifer o is-grwpiau'r Bwrdd bellach wedi dod i ben ac yn cael eu trin fel grwpiau tasg a gorffen ble mae swyddogion o bob partneriaeth yn cyfrannu ar lefel gweithredol i wireddu amcanion. Nodwyd bod nifer o'r grwpiau hyn eisoes mewn lle megis 'grŵp hyrwyddo hawlio budd-daliadau' a 'grŵp siarter teithio', i gynorthwyo lliniaru effaith tlogi ar ein cymunedau. Manylwyd ar y grŵp siarter teithio gan nodi ei fod yn ystyried nifer o ffactorau yn ychwanegol i gludiant cyhoeddus, megis dulliau teithio staff, gwefru cerbydau a phobl yn gweithio o adref.

Pwysleisiwyd bod yr Is-grŵp Iaith Gymraeg yn parhau i fod yn weithredol, gyda chynrychiolaeth o bob partneriaeth yn rhan ohono ac yn cydweithio gyda Chomisiynydd y Gymraeg. Adroddwyd bod yr is-grŵp hwn wedi bod yn gweithio ar brosiect i ymateb i heriau recriwtio yn yr ardal a bydd y canlyniadau yn cael eu cyhoeddi'n fuan.

Adroddwyd ar weithdrefnau cyflawni lefel uchel mae'r Bwrdd yn bwriadu eu cyflawni dros y ddwy flynedd nesaf. Esboniwyd mai gweithdrefnau ar gyfer dwy flynedd sydd wedi cael ei nodi hyd yma, er bod y cynllun llesiant yn un pum mlynedd. Cadarnhawyd bod y Bwrdd wedi gosod gweithdrefnau ar gyfer dwy flynedd yn unig er mwyn sicrhau sylfaeni cadarn o faterion gweithredol. Cydnabuwyd mai un o heriau sy'n wynebu'r Bwrdd yw ychwanegu gwerth i gymunedau heb ddyblygu'r gwaith mae partneriaid eisoes yn ei gwblhau eu hunain.

Mewn ymateb i ymholiad, tynnwyd sylw at ddau o'r gweithdrefnau cyflawni lefel uchel a gyflwynwyd. Eglurwyd bod y weithdrefn 'bod y Bwrdd yn Wybodus am Drawma' yn ofyniad gan y llywodraeth a bod aelodau'r Bwrdd yn derbyn hyfforddiant manwl am y pwnc ar hyn o bryd. Cadarnhawyd mai bwriad y weithdrefn yma yw sicrhau fod y Bwrdd a'i bartneriaid yn ymwybodol o sefyllfaoedd defnyddwyr gwasanaeth ac yn cymryd eu profiadau i ystyriaeth wrth ddarparu gwasanaethau. Ymhelaethwyd bod 'Cefnogi Teuluoedd a Chysoni Hawliau Plant' hefyd wedi cael ei nodi fel gweithdrefn i'r Cynllun Llesiant er mwyn sicrhau fod hawliau plant yn derbyn ystyriaeth wrth i'r Bwrdd cyflawni ei waith.

Diolchwyd am wybodaeth drylwyr yng nghyflwyniad llafar y swyddogion ond mynegwyd siomedigaeth gan Aelodau'r pwyllgor am ddiffyg gwybodaeth ysgrifenedig yn yr Adroddiad. Nodwyd bod hyn wedi arwain at anawsterau wrth geisio paratoi i graffu trefniadau'r Bwrdd yn effeithlon yn ystod y drafodaeth.

PENDERFYNWYD:

Derbyn yr adroddiad:

- **Gofyn bod adroddiadau i'r dyfodol yn cynnwys mwy o fanylder am y trefniadau cyflawni a sut mae cynnydd yn cael ei fesur er mwyn gwireddu amcanion y Cynllun Llesiant.**
- **Argymhell i'r Bwrdd Gwasanaethau Cyhoeddus bod yr adroddiad blynyddol yn cynnwys gwybodaeth am:**
 - **sut mae'r laith Gymraeg yn cael ei hyrwyddo fesul amcan llesiant**
 - **sut mae'r fethodoleg System Gyfan a Pwysau Iach: Cymru Iach yn llinyn euraidd drwy'r gwaith.**

6. LLAWLYFR CYNNAL PRIFFYRDD

Cyflwynwyd yr adroddiad gan Aelod Cabinet Priffyrdd, Peirianeg a YGC, Pennaeth yr Adran a Pheiriannydd Ardal Dwyfor. Tynnwyd sylw yn fras at y prif bwyntiau canlynol:

Atgoffwyd yr Aelodau bod y Llawlyfr Cynnal Priffyrdd wedi cael ei gymeradwyo gan y Cabinet ym mis Gorffennaf 2023 a'i fod bellach yn weithredol. Tynnwyd sylw at brif amcanion y llawlyfr wrth ei weithredu, sef sicrhau:

- Bod gweithdrefnau cynnal asedau priffyrdd y Cyngor yn cydymffurfio â'r canllawiau cenedlaethol presennol.
- Bod y Cyngor yn darparu rhwydwaith priffyrdd diogel sydd wedi ei gynnal yn dda.
- Bod safonau cynnal priodol yn cael ei gweithredu'n gyson ledled Gwynedd
- Bod safonau a dull gweithredu'r Cyngor yn gyson ag awdurdodau priffyrdd eraill o fewn Cymru.
- Bydd y Cyngor yn parhau i allu amddiffyn hawliadau trydydd parti a chymau cyfreithiol gan unigolion.
- Bod dyraniadau cyllideb cynnal priffyrdd yn y dyfodol yn cael eu dylanwadu gan risg yn hytrach na gan ffactorau eraill.

Cadarnhawyd bod y llawlyfr wedi cael ei ddatblygu i gynllunio sut mae'r Cyngor yn cydymffurfio gyda'r dyletswydd penodol o dan Deddf Priffyrdd 1980 yn ogystal â nifer o godau ymarfer cenedlaethol, i gynnal y ffyrdd a fabwysiadwyd gan y Cyngor. Manylwyd bod y llawlyfr wedi ei selio ar Gynllun Rheoli Asedau Priffyrdd (Gorffennaf 2010) a oedd ynddo'i hun wedi cael ei ddylanwadu gan 'Code of Practice for Highway Maintenance Management 2005'.

Nodwyd bod yr Adran yn gweithredu ar sail ardaloedd Dwyfor, Arfon a Meirionnydd oherwydd maint y Sir. Eglurwyd bod hyn yn drefn effeithiol er mwyn ymateb i ymholiadau cynnal ffyrdd yn amserol, gan sicrhau fod yr un trefniadau a gweithdrefnau mewn lle ar gyfer yr holl ardaloedd.

Cadarnhawyd bod y llawlyfr yn cael ei ddefnyddio fel canllaw dyddiol ar sut i gynnal ffyrdd y Sir ac yn amddiffyn y Cyngor rhag hawliadau trydydd parti ac achosion llys. Pwysleisiwyd bod y Cyngor wedi derbyn 343 o geisiadau hawlio trydydd parti rhwng 1 Ebrill 2016 ac 1

Ebrill 2024 a bod y Cyngor wedi llwyddo i amddiffyn 294 ohonynt. Manylwyd bod hyn yn gyfradd llwyddiant o bron i 86%.

Esboniwyd bod pob awdurdod lleol yng Nghymru yn cydymffurfio â chod ymarfer newydd a gyhoeddwyd yn 2016 sef 'Well-managed Highway Infrastructure: A Code of Practice'. Ymhelaethwyd bod Cymdeithas Syrffwr Sirol Cymru yn ymgynghori gydag awdurdodau lleol er mwyn llunio cynlluniau sy'n gyson yn genedlaethol er mwyn sicrhau nad oes newidiadau i gyflyrau'r ffordd pan mae teithwyr yn symud o un Sir i'r llall. Pwysleisiwyd bod awdurdodau lleol yn ymgymryd â sefydlu hierarchaeth rhwydwaith, trefniadau arolygu, trefn trwsio yn ogystal â defnyddio risg i ddylanwadu ar sut y caiff y gyllideb ei ddyrannu, i sicrhau nad oes newidiadau mawr ymysg Siroedd.

Tynnwyd sylw penodol i gymal 7.1 o'r llawlyfr a oedd yn nodi bod categori diffygion ffordd yn cael eu categorio fel diffyg critigol, diffyg diogelwch neu ddiffyg cynnal. Nodwyd bod y gwasanaeth yn arolygu ffordd yn rheolaidd gan wneud hynny yn fisol, pob 3 mis neu bob 6 mis yn ddibynnol ar ddsbarth y ffordd a'r defnydd a wnaed ohono.

Eglurwyd bod y gwasanaeth yn ymateb i unrhyw gwynion ac ymholiadau am gyflyrau ffordd gan y cyhoedd, cynghorau cymuned ac Aelodau Etholedig cyn gynted â phosib, gan ystyried diffygion posibl cyfagos eraill wrth wneud hynny pan yn briodol. Adroddwyd bod system asedau'r adran yn caniatáu i weithwyr weld hanes diffygion y ffordd wrth iddynt ymweld â rhai newydd, er mwyn gweld os yw'r diffygion hynny dal yn broblem neu os ydynt wedi eu datrys. Esboniwyd byddent yn gyrru adroddiadau i system WDM, sef y brif system i fonitro'r gwaith. Cadarnhawyd bod system WDM yn gyrru adroddiad wythnosol i swyddogion am y diffygion sydd wedi cael eu gweithredu arnynt ac i weld os ydynt wedi cael eu datrys yn amserol.

Mewn ymateb i'r uchod, awgrymodd aelod y byddai'n fuddiol i aelodau dderbyn cadarnhad pan fo problem a adroddwyd wedi ei ddatrys.

Esboniwyd bod trefniadau'r gorffennol yn gofyn i weithwyr ymateb i unrhyw ddiffygion diogelwch o fewn 24 awr gan ddatrys unrhyw ddiffygion neu amserlennu ei ddatrysiad. Cydnabuwyd bod hyn yn rhoi pwysau mawr ar weithwyr y gwasanaeth ac yn aml iawn nid oedd yn ddefnydd da o amser. Nodwyd bod y trefniant hwn bellach wedi cael ei newid fel bod gweithwyr yn ymweld â'r diffygion diogelwch erbyn diwedd y diwrnod gwaith canlynol o bryd gaiff ei hysbysu, gan roi hyblygrwydd ar benwythnosau a gwyliau banc. Eglurwyd bod hyn yn caniatáu i weithwyr raglennu gwaith yn fwy effeithiol a chreu pecynnau o waith er mwyn sicrhau bod y diffygion yn cael sylw yn amserol wrth sicrhau nad yw gweithwyr yn gwastraffu amser yn teithio. Cadarnhawyd nad oedd pryderon wedi eu hadnabod ers i'r newid hwn gael ei gyflwyno ond bydd yr Adran yn parhau i fonitro'r sefyllfa.

Nododd aelod ei gefnogaeth i'r llawlyfr a oedd yn nodi'r disgwyliadau gan ei wneud yn fesuradwy o ran perfformiad. Holodd os oedd yn ofyniad i arolygwr edrych ar yr adroddiadau archwilio blaenorol ac os oedd trefn mewn lle i adolygu adroddiadau archwiliad.

Mewn ymateb, nodwyd nad oedd archwiliadau yn cael eu hadolygu yn bresennol. Nodwyd y rhoddir ystyriaeth i wneud ymweliadau ad-hoc fel rhan o'r trefniadau newydd. Eglurwyd bod yr arolygwyr ffordd gyda mynediad i archwiliadau hanesyddol ar y tabled a ddefnyddir. Nodwyd bod sefydlu trefn i adolygu archwiliadau gan swyddogion allanol yn rhywbeth i'w ystyried.

Esboniwyd bod yr Adran yn y broses o ddarparu rhaglen waith ar sail nifer o categorïau cynnal strwythurol er mwyn adlewyrchu'r gwir flaenoriaeth o ffordd sydd angen sylw ar sail Gwynedd gyfan. Cydnabuwyd bod pwysau sylweddol ar gyllideb Cynnal Ffordd ac felly manylwyd mai'r categorïau a ystyrir wrth flaenoriaethu gwaith yw:

- Hierarchaeth
- Data sganiwr
- Cyflwr gweledol
- Blaenoriaethau ardal a rhwydwaith lleol
- Lefelau diffygion
- Oed adeiladu

Sicrhawyd os nad yw'r ffyrdd a flaenoriaethwyd yn derbyn sylw o fewn y flwyddyn gyfredol, bod pob ymdrech yn cael ei wneud er mwyn sicrhau eu bod yn ffyrdd blaenoriaeth uchel yn y flwyddyn ddilynol. Er hyn, Cydnabuwyd bod rhai elfennau yn dylanwadu ar drefn blaenoriaethu'r rhaglen waith megis dirywiad sydyn mewn cyflwr ffyrdd eraill neu dirlithriad. Pwysleisiwyd mai bwriad yr Adran yw datblygu rhaglen waith dros dair blynedd yn hytrach na rhaglenni blynyddol er mwyn nodi beth yw blaenoriaethau'r rhaglen waith a rhestru unrhyw resymau pam fod unrhyw ffordd wedi llithro ar y rhestr blaenoriaethau.

Eglurwyd bod goleuadau stryd yn derbyn ystyriaeth o fewn y llawlyfr cynnal priffyrdd a'u bod yn cael eu hasesu am eu cyflwr gweledol a diogelwch trydanol. Manylwyd bod rhaglen wedi ei ddatblygu ar gyfer cynnal profion strwythurol ar golofnau goleuadau drwy gontractwr allanol. Nodwyd bod y profion hyn yn sgorio'r colofnau i gategoriâu 'coch' (bydd angen ei waredu ymhen 4 awr), 'ambr' (bod angen ailbrofi'r golofn ymhen 6 mis) neu 'gwyrdd' (bod angen ailbrofi'r golofn ymhen 5 mlynedd). Derbyniwyd sylw bod goleuadau stryd yn gallu bod yn rhy dywyll mewn rhai ardaloedd gan beri gofid i gerddwyr gyda'r nos. Cydnabuwyd bod angen ail ymweld â rhai lleoliadau i asesu'r sefyllfa gan addasu'r gosodiadau 'pylu' goleuadau gyda'r nos yn ôl yr angen.

Diolchwyd am yr adroddiad.

PENDERFYNWYD

Derbyn yr adroddiad gan nodi'r sylwadau ac argymhell bod yr Adran Priffyrdd, Peirianeg a Ymgynghoriaeth Gwynedd:

- yn rhoi trefniadau mewn lle i adael i gynghorwyr wybod pan fo problem a adroddwyd wedi ei ddatrys.
- yn edrych ar sefydlu trefniadau i adolygu safon archwiliadau.

7. GWASANAETH EDRYCHIAD STRYD

Cyflwynwyd yr adroddiad gan Aelod Cabinet Priffyrdd, Peirianeg a YGC, Pennaeth Adran Priffyrdd, Peirianeg a YGC, Rheolwr Gwasanaethau Stryd a Rheolwr Prosiectau. Tynnwyd sylw'n fras at y prif bwyntiau canlynol:

Nodwyd yn dilyn trosglwyddo'r y Gwasanaeth Casglu Gwastraff ac Ailgylchu i'r Adran Amgylchedd, cymerwyd y cyfle i ail-drefnu rhai gwasanaethau yn yr Adran. Eglurwyd bod y gwasanaethau Glanhau Strydoedd, Gorfodaeth Stryd a Thîm Tacluso Ardal Ni wedi uno i greu un gwasanaeth newydd o'r enw 'Gwasanaeth Edrychiad Stryd' o dan un rheolwr. Pwysleisiwyd mai nod y Gwasanaeth Edrychiad Stryd yw ceisio cyrraedd amcan y Cyngor o wireddu Cymunedau Glân a Thaclus drwy Wynedd er lles trigolion, ymwelwyr a'r economi leol.

Nodwyd bod y tîm Glanhau Strydoedd yn gweithredu ar ofynion statudol er mwyn sicrhau bod strydoedd y Sir yn lân, tra bod tîm Gorfodaeth Stryd yn canolbwyntio ar gosbi pobl am lygru, tipio neu am beidio codi baw ci. Eglurwyd bod y Tîm Tacluso Ardal Ni yn dîm

gymharol newydd sy'n cyfrannu yn sylweddol at wella edrychiad a delwedd ein strydoedd a'n hamgylchedd.

Adroddwyd bod adolygiad manwl o wasanaeth Glanhau Strydoedd wedi ei gwblhau a bod cynllun gwella wedi cael ei ddatblygu yn seiliedig ar yr adolygiad hwnnw. Nodwyd bod y cynllun gwella yn ffocysu ar ansawdd ac effeithlonrwydd y gwasanaeth, technoleg gwybodaeth a datblygu fflyd werdd. Pwysleisiwyd bod adolygu'r cylchdeithiau yn flaenoriaeth yn dilyn yr adolygiad. Cydnabuwyd bod systemau trefnu cylchdeithiau a chasgliadau bellach wedi dyddio ac yn creu her wrth geisio cyflawni gwasanaethau. Cadarnhawyd bod yr Adran yn buddsoddi mewn system newydd i optimeiddio cylchdeithiau gan obeithio bydd hyn yn adnodd i sicrhau gwasanaeth modern ac effeithlon sy'n cyfrannu at ddelwedd y Sir, tra hefyd yn gymorth i gyrraedd targedau arbedion presennol. Esboniwyd bydd y system yn gallu llunio cylchdeithiau o'r newydd er mwyn sicrhau bod amser yn cael ei reoli'n well a hefyd yn cynnig gwelliannau i'r fflyd.

Ymfalchiwyd bod yr Adran wedi bod yn llwyddiannus i dderbyn bid ariannol er mwyn sefydlu Glanhawyr Trefol. Manylwyd y gobeithir bydd gweithwyr yn defnyddio cert a sugnydd sbwriel trydan mewn trefi ym mhob ardal o Wynedd. Nodwyd y bwriedir newid oriau gwaith mewn ardaloedd trefol (gan gynnwys pentrefi) o 5yb hyd at 1yh fel eu bod yn gweithio o 8yb i 4yh tra'n parhau i gydymffurfio gyda chod ymarfer am lendid stryd digonol erbyn 8yb ble yn briodol. Gobeithiwyd bydd hyn yn sicrhau bod y timau yn weledol i'r cyhoedd gan ennyn gwerthfawrogiad am eu gwaith.

Adroddwyd bod yr Adran wedi llwyddo i recriwtio mwy o swyddogion i'r gwasanaeth Gorfodaeth Stryd yn dilyn cyfnod heriol. Cadarnhawyd bod y nifer o ddirwyon a ddosbarthwyd wedi cynyddu yn ddiweddar oherwydd hyn. Nodwyd bod diweddariad pellach yn cael ei baratoi ar gyfer y wasg er mwyn i drigolion fod yn ymwybodol o waith y gwasanaeth hwn i'r dyfodol. Eglurwyd bod y gwasanaeth yn cydweithio'n agos gyda Taclo Tipio Cymru ac wedi adnabod manteision o ddefnyddio teclyn 'Flymapper' mewn ardaloedd prysur i daclo'r broblem. Cydnabuwyd bod Bangor yn ardal ble mae tipio yn broblem a bod swyddogion yn datblygu cynllun ar gyfer yr ardal i atgoffa trigolion o reolau gwaredu gwastraff. Nodwyd os bydd yr ymgyrch hwn yn llwyddiannus, y byddai'n cael ei ddatblygu i'w rannu drwy Gymru gyfan. Tynnwyd sylw o gynlluniau Llywodraeth Cymru i ryddhau Cynllun Atal Sbwriel a Thipio Cenedlaethol a bydd ei gyhoeddiad yn arwain i'r Adran addasu eu Cod Ymarfer.

Nodwyd mai un o flaenoriaethau'r gwasanaeth Gorfodaeth Stryd dros y gaeaf oedd delio gyda baw cŵn. Pwysleisiwyd bod y broblem hon yn flaenoriaeth barhaus i'r gwasanaeth a bod swyddogion wedi bod yn adnewyddu arwyddion a biniau dros y gaeaf. Mewn ymateb i ymholiad, nodwyd gan fod mwy o gŵn yn yr ardal ers y blynyddoedd diwethaf bod yr Adran yn ceisio canfod balans o ran prynu mwy o finiau baw ci. Cydnabuwyd bod hyn yn her i'r Adran oherwydd heriau ariannol ac mae ychwanegu biniau i'w gwagio ar gylchdeithiau yn effeithio ar allu gweithwyr i'w gwagio'n amserol. Er hyn, cydnabuwyd bod newid i reoliadau yn caniatáu i berchnogion cŵn waredu baw ci mewn unrhyw fin gweddilliol cyhoeddus arferol a ddarperir gan y Cyngor. Soniwyd bod Gorchymynion Diogelu Mannau Cyhoeddus yn cael eu hadolygu ar hyn o bryd yn unol â gofynion statudol i'w diweddarau. Cadarnhawyd bod ymgynghoriad am y gorchymyn yn digwydd dros yr wythnosau nesaf a bydd hyn yn gyfle i unrhyw un leisio barn am broblemau baw cŵn sydd yn eu hardaloedd ymhlith materion cysylltiedig eraill.

Eglurwyd bod Tîm Tacluso Ardal Ni yn brysur iawn gydag ystod eang o gyfrifoldebau. Nodwyd bod y gwasanaeth hwn yn fwy gweledol i drigolion Gwynedd ac mae'r Adran yn derbyn adborth cadarnhaol am eu gwaith yn rheolaidd. Esboniwyd bod natur gwaith y tîm yn newid wrth iddo ddatblygu gan nodi fod cryn bwyslais yn cael ei roi ar ymgyrchoedd canol trefi yn ddiweddar. Cadarnhawyd bod y gweithwyr bellach yn arbenigwyr gyda'r offer sy'n cael ei ddefnyddio i gyflawni'r gwaith. Ymfalchiwyd bod Cyngor Sir Gaerfyrddin wedi lansio

ymgyrchoedd timau tacluso yn ddiweddar gan ddilyn nifer o brosesau a ddatblygwyd gan Gyngor Gwynedd.

Holodd aelod a fyddai modd lledaenu'r defnydd o'r trefniadau gwneud cais i'r Timau Ardal Ni i wasanaethau eraill. Mewn ymateb, nododd Pennaeth Adran Priffyrdd, Peirianeg a YGC y byddai'n codi'r mater mewn cyfarfod o'r Tîm Rheoli Corfforaethol er mwyn trafod y posibilrwydd o ledaenu'r model.

Cadarnhawyd bod 5 o finiau clyfar wedi cael eu gosod mewn lleoliadau prysur ar draws y Sir. Eglurwyd bod y biniau yn cael eu pweru gan egni solar er mwyn cywasgu'r sbwriel fel nad oes angen i'w gwagio mor aml. Nodwyd bod neges yn cael ei yrru gan y bin i systemau'r gwasanaeth i'w hysbysu bod angen ei wagio, cyn iddo fynd yn orlawn ac achosi blerwch. Ymfalchiwyd bod yr Adran wedi llwyddo i ddenu arian grant eleni er mwyn buddsoddi mewn isadeiledd canol trefi. Eglurwyd bydd cyfran o'r arian yn cael ei ddyrannu i fuddsoddi mewn mwy o finiau clyfar a meinciau clyfar. Nodwyd bod cost y biniau clyfar yn ddrud ac felly mae'r Adran yn cydweithio gydag Adran Technoleg Gwybodaeth y Cyngor i geisio datblygu technoleg gyffelyb i'w ddefnyddio ar finiau yng Ngwynedd am bris rhatach na'u prynu.

Mewn ymateb i ymholiad, cadarnhawyd bod bwriad i ychwanegu mwy o finiau ailgylchu cyhoeddus ar draws y Sir. Er hyn, nodwyd bod y biniau ailgylchu sydd eisoes wedi cael eu lleoli yn cael eu camddefnyddio ac felly mae angen datrys y broblem hon cyn ychwanegu mwy ohonynt. Eglurwyd nad ydi cynnwys biniau gweddilliol a biniau clyfar ddim yn cael eu didoli gan fod eu cynnwys yn cael ei losgi.

Diolchwyd am yr adroddiad.

PENDERFYNWYD

Derbyn yr adroddiad gan nodi'r sylwadau a gyflwynwyd yn ystod y drafodaeth.

8. EITEMAU'R CYFARFOD NESAF

Cyflwynwyd yr adroddiad gan yr Ymgynghorydd Craffu gan nodi'r prif bwyntiau canlynol:

Adroddwyd y cytunwyd yng nghyfarfod y Pwyllgor ar 22 Chwefror 2024, byddai'r Cadeirydd a'r Is-gadeirydd yn eu cyfarfodydd cyswllt gyda'r Penaethiaid ac Aelodau Cabinet perthnasol, yn adnabod eitemau i'w trafod ynghyd â'r eitem 'Cyfarwyddyd Erthygl 4 - Ymgynghoriad Cyhoeddus' yng nghyfarfod 16 Mai 2024.

Cadarnhawyd bod eitem ychwanegol wedi cael ei adnabod o fewn cyfarfod cyswllt y Cadeirydd a'r Is-gadeirydd gyda Phenathiaid ac Aelodau Cabinet perthnasol fel mater posib i'w graffu, sef 'Clwyf Gwywiad yr Onnen'. Esboniwyd fod y mater wedi ei gynnwys ar gofrestr risg yr Adran Priffyrdd, Peirianeg a YGC a nodwyd bod gan y Cyngor raglen waith i adnabod y Clwyf mewn coed ac i'w drin. Manylwyd y gellid craffu maint y broblem a'r cynnydd a wnaed o ran delio gyda'r Clwyf yn ogystal â'r gost o ddellio gyda'r Clwyf hyd yn hyn a'r costau a rhagwelir i'r dyfodol. Gofynnwyd i'r Pwyllgor gadarnhau os oeddent yn dymuno craffu'r eitem hon yn ogystal ag 'Erthygl 4 - Ymgynghoriad Cyhoeddus' yn y cyfarfod a gynhelir ar 16 Mai 2024.

Atgoffwyd yr Aelodau byddai cyfle iddynt flaenoriaethu eitemau i'w craffu ar gyfer y pedwar cyfarfod arall a gynhelir yn ystod cyfnod 2024/25 yn y Gweithdy Blynyddol a gynhelir yn yr wythnosau nesaf.

Mewn ymateb i sylwadau gan aelodau, eglurwyd y byddai'n amserol i graffu'r eitem 'Cyfarwyddyd Erthygl 4 - Ymgynghoriad Cyhoeddus' yng nghyfarfod 16 Mai 2024 i sicrhau

bod mewnbyn Aelodau'r Pwyllgor yn cael ei dderbyn cyn i Aelodau'r Cabinet drafod yr eitem yn y misoedd canlynol. Atgoffwyd yr aelodau bod yr amserlen i drafod yr eitem hon wedi llithro gyda'r Pwyllgor wedi penderfynu yn ei gyfarfod diwethaf i'w symud o'r cyfarfod yma i gyfarfod 16 Mai 2024 yn sgil cyfnod cyn-etholiadol etholiad Comisiynydd yr Heddlu rhwng 25 Mawrth a 2 Mai 2024. Pwysleisiwyd byddai craffu'r eitem yng nghyfarfod 16 Mai yn amserol ac yn gyfle i'r Pwyllgor wneud argymhellion i'r Cabinet.

PENDERFYNWYD

Cadarnhau bydd yr eitemau isod yn cael eu craffu yng nghyfarfod y Pwyllgor a gynhelir ar 16 Mai 2024:

- **Cyfarwyddyd Erthygl 4 – Ymgynghoriad Cyhoeddus**
- **Clwyf Gwywiad yr Onnen**

Dechreuodd y Cyfarfod am 10:40yb a gorffennodd am 1:00yp

CADEIRYDD